



CUMÙNI DI TARRANÓA

Un annu nòu e un cumènciu nòu pa' l'Ufficiu di la doppia Linga, Gaddhurésa e Salda, di la cità di Tarranóa

TARRANÓA– In chistu primmu mesi di lu 2023 àni presu avvìu l'attività di l'Ufficiu di la Linga (Sportello Linguistico) di lu cumùni di Tarranóa. V'à una nuità manna: la Linga Salda venarà pultata a innanzi e galdàta comu è statu fattu annu passatu pa' lu Gaddhurésu, una di li galitài "alloglotti" di la Saldìgna, chi faci di patrona in cità e in parìcchji cussògghji accultu.

Chisti dui linghi saràni in primmu pianu cu' l'attività di traduzioni e s'allalgaràni ancóra a fóra di l'Ufficiu; si 'ó arrià a trabaddhà insèmbi a li scóli e a sikhì attività undi póni piddhà palti più passòni di lu lócu. Pa' lu più, lu scoppu di l'operadóri sarà chissu di punì a puntu lu chi è statu impustatu da la Legghji Nazionali 482 di lu 99 e da la "Legghji di la spirànzia", la Legghji Regionali 22 di lu 2018, chi faédhha di galdà, dà valóri, bandià e spagli li linghi, Gaddhurésu e Saldu e la só' cultura.

Tuttu chistu sarà pussibbili grazi a lu projektu **Tarranóa e Terranoa** vulùtu e sintùtu abbeddhu da l'Amministràziòni di lu Cumùni di Tarranóa, più in fini da l'Assessóri Sabrina Serra, sigùtu da l' "Istituto Chircas" e finanziatu da la Regioni Autonoma di la Saldìgna pal mezu di li legghji mintuàti a innanzi.

Sèndi abbeddhu attaccati a li proppi radìci e amantiósi, ma più e più spèlti e pripparàti, l'operadóri saràni cuntenti di agattà cassisla passòna agghja gana e piaceri di dummandà infulmaziòni innantu a li linghi, pruppunì progetti o attività.

L'Ufficiu à di fà 1560 ori, spaltuti a mitài tra Gaddhurésu e Saldu, s'agatta illu museu archeologicu, e sarà abbaltu a la ghjenti (front office) dugna dì, da lu luni a lu 'ènnari da li 9 di matinata a l'una.

Pa' la linga gaddhurésa l'operadóri chi sigaràni l'Ufficiu saràni l'amantiósa **Anna Maria Giagheddu**, dutt. **Claudia Pulixi** e dutt. **Simona Brandano**, e pa' la linga salda dutt.. **Salvatore**



CUMÙNI DI TARRANÓA

Canu, dutt. **Francesca Sistu** e dutt. **Sabrina Sotgiu**. Iddhi mattessi saràni dispunibbili ancóra pal mezu di lu 'ndirizzu mail sportellolinguistico.olbia@gmail.com e innantu a la pagina Facebook *Tarranóa e Terranoa*, chi venarà trattàta ancóra pa' spaglì e bandià li papéri tradotti e li trabaddhi fatti.

Indrentu a lu projektu v'à ancóra **2 scóli di fulmaziòni**, una pa' lu Gaddhurésu e una pa' lu Saldu, di 30 ori dugnuna, chi venaràni bandiàti, comu meddhu si pó, pa' sapé candu cumenciani, comu iscrissi e undi si facini, pal mezu di li canali istituzionali di lu cumuni e di l'Ufficiu.

In un lócu di tantu 'alóri, com'è Tarranóa, s'è cuscènti chi lu tramandà di chisti linghi da una 'inìa a l'alta si sia paldendi ma, siddhu si saràni comprési lu pruvvèttu, lu 'alóri e la folza chi àni, a pocu a pocu, si podarìa cambià chistu caminu chi sò pidhendi. Com'è unu sciaffèrru dapói chi s'avvìdi chi s'à faddhutu la carréra, ghjira e furrìghja, cussì chisti linghi, chi érani andendi a agabbassi, podaràni cambià caminu vel di una sèmita nóa chi li tòrria a dà vita!

"Turrèmu a cumincià cu' li trabaddhi di l'Ufficiu di la Linga cun beddhi nuitài – dichjara l'Assessóri Sabrina Serra - li trabaddhi saràni in dui linghi, Gaddhurésu e Saldu. Tarranóa à chistu beddhu ditilmìnu d'aé dui linghi e pal mezu di l'Ufficiu vulèmu sighì a galdà, spaglì e bandià li tradiziòni trattendi la Linga. Saràni abbeddhu li nuitài par abannu, pa' lu più l'attivitài insembi a li scóli e a li più ciòani, e una scóla di fulmaziòni in lingua abbalta a tutti."

Tandu, bon cumenciu náu a l'Ufficiu cun dui linghi di la cità di Tarranóa e un bon cumènciu náu ancóra a lu Gaddhurésu e a lu Saldu.

Progetto "TARRANÓA e TERRANOVA" Finanziatu da la Regioni Saldigna cu' la Legghji 482 di lu 99 e cu' la Legghji Regionali 22 di lu 2018 e sigutu da lu Istitutu Chircas